



831302

道光己丑鐫

二
南

詩
鈔

紐香齋藏板

戊子秋余薄游灞陵適硯友二南周子館福雲署
中因得朝夕過從相與縱談古今聞及鄉國文獻
一日出余所輯山左詩彙鈔就正二南二南卒讀
一過謂頗不謬于是非遂手一編示余曰此余生
平心血之所在也今老矣無志進取以子究心風
雅尙其爲我定之庶千百年後或有知其人者余
受而讀之而不禁喟然歎也竊謂

國孰詩學之盛超軼往古新城尙書以唐賢三昧
提唱宗風一變明季餘烈契下士翕然宗之對精

二南詩鈔

余序

年無異詞迨其後英葩蕃出輒逞其臆見以根詆
謨雖一時鴻才碩彥類能獨具手眼各自成家而
入主出奴是丹非素嚴格律者薄性情侈神韻者
乏風骨或矜言奇創而反流于俗或矯語真樸而
轉失之鄙求其優柔真挚蘄無愧于溫厚和平之
旨者往往難之夫詩之爲道本乎性情止乎禮義
不必區漢魏而別宋唐也詩之爲教深乎比興長
于諷諭不必矜初盛而薄輓近也善乎明陸仲昭
之言曰詩須觀其自得古人佳處不在言語間然

則詩亦求其自得焉可矣奚必頌言漢魏標舉盛唐而後始謂之詩人也哉今統觀二南諸作語本性靈詞尙醇雅懷人則落月屋梁情深一往遣懷則池塘春草興寄無端言情之什纏綿悱惻而不病于浮寫景之篇秀倩風華而不傷于縟而一切撫時感事之作詠懷弔古之詞輒復激昂慷慨流連徘徊而不能自己洵乎其有以自得而無愧于溫厚和平之旨者矣二南詩總可千餘篇余謹就鄙見錄存若干首其他遺詞麗句遺棄者尙多譬

二南詩鈔

余序

二

之採玉于山探珠于淵取之固有不盡者集成因綜述先哲緒論還以質之二南並以質之讀二南詩者二南其許我乎世有鍾期固可相賞于高山流水間也道光己丑夏四月同里愚弟余正西謹叙于青門寓舍之藤花軒

古者詩與易書禮春秋並垂爲經而易書禮復多有韻之文後世顧殊文與詩而二之且曰詩有別才非關學也亦獨何哉吾聞聖王之爲教也禮樂法度既有官以司其事紀其詳論其是非得失於是詞人學士作爲雅頌道揚德意下及里巷謳謠又以時採而錄之獻諸天子考其民風播爲政事故曰聲音之道與政通也自世第以詩爲諷詠性情之具漸而卽于譏刺流爲酬應詩之教遂不可復覩無怪乎其殊詩於文也已夫文之所以貴乎

二南詩鈔

姚序

天下者非貴其綺麗繁富貴其言之立而不朽也詩獨非言乎哉然而道衍於支蔓也久矣儒者閉戶讀書各以已見論列往古仁賢固知其絕無增損於前人而不憚論議之煩吟諷之數者遵其導以先路而凜其示以覆轍也夫如是足迹所至訪其名流弔其山川寤寐之思形諸慨歎質言之爲記序論辨諸文感賦之則有登眺懷古諸什義固無大殊焉若夫辭氣之悲壯淋漓與夫音節之抑揚縹緲則又其人之性情與境相值而成有不自

知其所以然者而漫曰漢魏也六朝也是非所謂
摘春華而廢秋實者耶雖然代有不同體亦屢變
後賢欲工其事每見囿於前賢之範圍則思自闢
門徑以避之勢分而不可卒合將欲鎔冶鍛鍊使
成一家誠有所甚難則亦各就己之所已至者爲
之而已或工焉或拙焉始不必計要無謬乎古人
立言之旨而不溺於譏刺酬應者之所爲不旣快
然自得乎哉歷城周君二南與余交已半載盡讀
其詩又見其所著散行及駢體諸文學富而功力
二南詩鈔

姚序

二

亦深下筆惟立言是務余因舉詩文相通之理以
序其詩二南其亦必韙余言也夫道光九年歲次
己丑仲冬之月桐城姚景衡序

道光壬午春閏同里知交東歸者踵相接二南留滯都門與余同溷跡緇塵一夕剪燭共話出吟草示余蓋寓郡館紫雲榭時張北麓代爲編錄者因攜歸盥手讀之余懷不覺根觸而有動也始余與二南同補博士弟子員二南不鄙余謏陋相視莫逆旣而余春官屢上二南亦連不得志於秋闈僅獲貢入成均流光荏苒少壯如昨余與二南同慨乎其言之余廿餘年來溺制舉業於詩古文詞喜涉獵而樊籬未窺偶有所作自顧不堪覆瓿遂置

二南詩鈔

梁序

之不存二南之文清警靈雋固已卓越恒流而雅耽吟詠援筆立成坎壈纏身不顧也其格調則不煩繩削而自合其故實則一經鏤鑄而愈新忽而莊語忽而滑稽或氣韻沈雄如幽燕老將或丰姿綽約如姑射仙人夫詩本性情真而詩與之俱直陸士衡云詩緣情而綺靡又何唐音宋派之拘拘乎咏古諸篇如眉山蘇氏作論每從常解翻進一層尤不屑拾人唾餘人謂二南之詩窮而後工余謂二南卽不窮亦必工詩無疑特因窮而抑塞

幽渺之詞多益令人憐其才而悲其遇耳吾鄉擅
湖山之勝李杜游蹤與詩篇俱傳邑人如辛稼軒
晁補之張希孟諸公暨邊華泉尙書劉函山吏部
李滄溟觀察皆以碩才宏學雄視一代下逮殷棠
川許殿卿諸先生亦能張幟騷壇後先輝映今余
累舉不第久以白蠟明經見哂同儕濫廁四門博
士冀邀微官謀升斗二南若及今掇青紫猶能和
其聲以鳴盛繼此之同不同殆未可知而新吟日
富詩卷長留於以追往哲之芳躅俾鄉先輩流風
不致音沈響絕歎接武之無人二南當勉任其責
矣余雒頌之餘竊以滋愧因直據胸臆而質言之
二南儻不讓余爲濫量貢諫云爾道光二年歲次
壬午秋仲同里愚弟梁士俊石民書於宣武門外
之蓮花寺

二南詩鈔

梁序

二

壬戌歲予與二南相遇於湫時予年二十九二南
又加遜焉見則傾懷相與縱談天地古今之變與
一切英雄厄會奮功竒傑可歎之事酒酣高歌涕
泗滿頤蓋不知二南爲予予之爲二南也遂晤其
兄都尉公都尉起武舉積苦兵間經百餘戰能出
竒以制敵人間二年都尉死予往哭之又會於歷
下自是二南薦仍大故凡丁母艱與葬叔母妻子
之役者蓋六七遭焉於是悲鬱之情慘懷哀怨之
音讀其詩恍然遇之二南不專長於詩并能文章

二南詩鈔

周序

一

又不僅詩文而長於當時之務然而好爲詩一有
所感其聲應心而出其材又能宛轉形模運使古
今策物里巷纖俚歌謠之詞如碎金之於大冶一
鎔之旬然宏聲出焉辛巳歲再晤歷下今年春予
在都二南旋貢太學兩人相駭老矣悲歎昔時如
同夢寐今夕一遇又不知相會何年過此一往亦
同此感歎否耶嗟乎二南旣不得志於時而伸之
於詩夫詩性情之學也古之婦人女子其言猶在
於經豈非其敦厚之吉有發人感動者與後之人

愈工而寢失其旨如騷人之清深靖節之恬夷後
人心摹力追不能到也夫古人之學由源而逮委
後人窮委而昧源侈得一二淫冶之浮詞則藉以
弋富貴而博當時之譽求之不得則怨久則志湮
氣頹并其所謂組練者胥失之矣詩如是而文亦
然然而詩文遍天下非二南孰足與語此哉二南
詩多發於性情就其合於古人之旨者數十首而
已數十首者吾猶節取之然而較之天下盈篋累
笥瞥眼無有者固有間矣夫詩非一二愛之者所
能傳也傳者雖不愛亦不禁傳也如子言爲公也
自有後之人在二南宜卽詩以思其所以昌於後
者彼窮通榮枯皆片時事使子不滯於懷也此後
所得之章吾再爲子言之

道光二年歲次壬午閏三月中浣

東阿愚兄周天爵敬修氏敘并書

二南詩鈔

周序

二

夫詩之爲教以善道人情爲工以暗合古人爲妙
至於雄奇淡遠犀利芊綿則各隨其人之性情兼
視其人之造詣苟取古人之詩字仿而句摹之自
謂逼真王孟具體杜韓古人其許之乎蓋不讀古
人之詩固不能爲詩而不離古人之詩依然其不
能爲詩也濟南素稱詩藪代有詩人以今觀之吾
友周子二南其選也二南不飾容貌談言微中其
詩如徐夫人匕首無堅不入無朽不摧受其卷而
讀之不禁低首降心而服其爲真詩人也然世之

二南詩鈔

范序

一

論詩者猶交口譏之以其不襲古人之成規遂不
入時人之彀率且於人所已言者姑置不論獨能
以幽微之思精妙之語言人所不能言詩境如幽
篁坐月面面玲瓏而月轉陰移輒復殊觀又如風
簷鐵馬天籟時鳴冰雪之花自成文采故嘗贈以
句云眼前景致精刻畫耳中常語排生硬但攄方
寸寫性靈不顧衆口譏聲病於此可以見二南之
詩並可以見余傾服二南之詩也或曰其才若是
胡爲世所病也余曰是不飾貌之故耳村農談稼

穠語至精也不若峩冠博帶之動聽山妻問寒暖
情至篤也不若粉白黛綠之娛心其文亦若是故
屢試不售也或又曰子與莫逆胡不勸其薄施朱
粉以求合於時也余曰人有不爲也而後可以有
爲巧言合色左邱明恥之使二南捨此而趨彼是
猶適胡而南轅之越而北轍也是猶贈原思以肥
馬輕裘而處子貢於簞瓢陋巷也優孟之衣冠未
必爲古人所許邯鄲之步武適足爲時人所笑也
余固不言也言亦不信也嘉慶癸酉孟秋同里愚

二南詩鈔

范序

二

弟品泉生范垌謹序

序

守青氈而欲老髮縈今古之愁燒紅炬以成灰淚
滴英雄之血匱中美玉得價而珍匣內明珠暗投
不貴卽今聞達伊誰繡虎之才自古沈淪豈盡雕
蟲之輩積半生之抑鬱借寸管以宣揚是以哀樂
和聲每寓言於高山流水篇章成帙多無愧於白
雪陽春歷下二南先生系出濂溪家移海右一寒
至此四時之絃誦如常十上不行五夜之揣摩益
力飽餐經史別有專門隨意謳吟乃其餘技運彼

二南詩鈔

蔣序

玲瓏之手擲來金石之聲家無詩婢詩奴而引羽
刻商指揮如意才兼詩仙詩史凡闡幽紀實摹寫
入微花樣重翻不受前人之束縛蕉心層剝應聞
夜鬼之悲啼而且論世知人詠古獨留隻眼賦形
因物化工只在寸心極窮愁刻苦之音得正變貞
淫之肯况又性耽麴蘖不難擊鉢揮毫情重金蘭
雅好唱予和女儻使青年釋褐聲名早重於雞林
竚看白首簪花姓氏益香於鴈堦今日有操選政
推我二南同儕欲角詞壇看他三北

嘉慶二十三年歲次戊寅六月雲間愚弟蔣錦標
望峰氏叙并書

二南詩鈔

蔣序

二

望峰氏叙并書

嘉慶二十三年歲次戊寅六月雲間愚弟蔣錦標

題詞
華岱鬱峩峩武夷竦秀峙江漢流浩浩青溪湛清
泚山水固云然論詩亦如此吾愛二南詩意象難
窮擬縹緲步虛聲劊削渾沌死利刃斷吹毛寒泉
滴石髓不作一直筆九曲珠穿蟻不留一滯相鏡
花月在水如游武夷曲奇峯當面起如泛青溪波
粼粼蹙文綺時或發新聲亦偶契古旨讀破萬卷
書別類一種子全舒已性情

二南題友人鄭君集句

自道所得矣

二南詩鈔

題詞

同里仲恂弟李儻拜題

卅年稷下苦吟身吾本瀾翻筆有神曲折闢成蹊
徑別聰明寫出性情真達如伯道能知命才似仲
容無礙貧前輩吾鄉數邊李於今風雅此傳人
庚辰正月同里愚弟代麓何鄰泉拜題
幽蘭在空谷春氣常益盎本無出世心何求世人
賞濟南名士多佳話傳昔曩我讀二南詩神思豁
開朗滌筆秋江清吐氣西山爽情深語自真造意
成孤往伊人渺何許使我心悵惘何必識其面佳

處令人想

道光元年歲次辛巳海寧俞顯以題并書

半世柴門掩鮎吟不畏貧果然語言妙獨得性情
真絕嗜瓶空酒忍饑甌有塵寥寥邊李後代起更
何人

歷下余曾到深慙未識荆公車勞枉顧身世感浮
生友道嗟零替吾儕鍾性情西窗燒短燭款語到
天明

鴻案傷頻斷鴿原悵莫尋至情所鍾處寄託亦何

二南詩鈔

題詞

二

深遇塞青年過詩成白髮侵浪仙人不識愧說是
知音

十日衙齋飲鬚眉照膽寒縱談天下事共作古人
看緣結三生契詩爭一字安詰朝歸濟上好語託
飛翰

伯良愚弟張杰拜題

讀罷新詩卷爲君意黯然奇才艱一第厄運過中
年棋酒情無賴文章會有緣祇今齊魯士屈指讓
誰先

雁行君最盛，棣萼感偏深。慷慨沙場節，淒涼原隰心。雙忠惜箕尾，諸季戒商參。信道兄難做，招魂淚滿巾。

本是多情客，其如再悼亡。死生原最痛，貧困倍堪傷。玉骨先同穴，荆釵賸幾行。貌神知並悴，賦自勝

河陽

文士偏艱嗣，蒼天有意無。既然讐伯道，何必產童烏。嘉實秋方結，曇花兩本殊。夙欽純孝友，定卜得鸞雛。

二南詩鈔

題詞

三

風雨寒氈破，關河客路難。清流尋渭水，落葉正長安。幸有牛衣伴，休歎鶴鬢單。西征富吟草，也算旅囊寬。

賤子傷心處，先生大畧同。知交千里外，傾蓋片時中。獄荷憐中散，詩慚答太冲。郵筒遲遠寄，極目望飛鴻。

道光戊子秋日

二南四兄先生將有秦中之游賦此贈別

直齋弟章寅拜草

我輩窮通異三生各有因智輸公瑾捷老耐少陵
貧愛爾才無敵貽余句入神相期千古在莫門眼
前春

襪被曾相約名山幾日游谷深無客到壁峭有詩
留鳥語空潭寂霜寒落木秋吾鄉衆年少爲爾一
低頭

同里老友晚階尹廷蘭

湖干剩有舊簞瓢頭白周郎氣尚驕四海名流傳
顧曲千秋哀豔託離騷乾坤落拓悲雙鬢衰展風
流問七橋我欲從君來雪夜玉梅花下伴吹簫

二南詩鈔

題詞

四

癸未孟冬繡江戟門弟李廷榮拜題

江湖多賤貧深得固窮節奈何五十年厭厭竟良
月顧盼莫誰知了無一可悅慷慨獨悲歌時時見
遺烈

猛志故常在老至更長饑被褐欣自得有酒斟酌
之得知千載外言詠遂賦詩賦詩頗能工懷此貞
秀姿

舉俗愛其名百世當誰傳良才不隱世終古謂之
然白髮被兩鬢離憂滿目前舉世無知者鍾期信

爲賢

集陶詩三章題奉

二南四兄大人正

同里松石弟喬嶽

本非功名士焉用抱窮愁微祿干堯舜終愧巢與
由不見道旁塚纍纍多公侯胡爲慕冷官熱中不
能休西游登華嶽南泛五湖舟孤鶴任高飛閒雲
自去留一笑寒羶客羈紲類楚囚昔嘗又安問其
得錢妻孥喜安坐享溫飽老子嘔心肝辛苦復誰
曉嗟哉鬢毛蒼平爲兒女老君累漸無多且復省
二南詩鈔

題詞

五

問多少

煩惱自非奉二親餘皆可草草得失不足論又焉
得氣偶然生氣散形與俱吾身非吾有又安問其
餘君懷本曠達詩酒足歡娛浩歌滿天地荷鍤埋
路隅他日騷客過憑弔重欷歔樽酒酌君墓梓桑
式君廬勝有不肖子貧窮賣父書

道光丁亥秋日讀集中自慨三首意不勝悲

輒依篇作曠語解之

二南達人諒不鄙余言也

松石嶽又題

夜坐開君卷孤燈對寂寥愁懷聊自遣詩興總難
消暮雨橫秦嶺西風過灞橋遙知苦吟處頭白幾
魂銷

聚首無多日心期話此宵澆愁杯共把惜別燭頻
燒晉國山河險秦關道路遙風霜須鄭重莫使鬢
華凋

奉題

二南先生秦游草卽以送別

陽邱東溟弟李滄瀛拜草

二南詩鈔

題詞

六

歷下苦吟客湖山秀氣鍾神清寒似雪筆健矯如
龍綽約春堤柳蕭疏古澗松總留真意在詩境幾
陶鎔

浮雲看富貴指點眼前花笑我猶彈缺如君合籠
紗風塵餘故態筆墨送生涯共有千秋業吟成手
幾叉

道光九年歲次己丑暮春既望題奉

二南四兄先生吟稿

蜀南弟張鳳翎希文拜書

頭白吟猶苦遇窮詩豈窮拈毫花並發刻楮葉能
工韻在古絃外語如人意中一編問千載賞識與
誰同

校定

二南集成敬題卷首

同學弟余正酉秋門拜草

獨有味中味還餘音外音怪來頭白盡都爲此清
吟廿載困羈旅一編銷壯心秋門如不遇謙識伯
牙琴

二南詩鈔

題詞

七

歲戊子余宰灞陵適二南秋門先後至余署中
二南因出所爲詩屬爲編定余以吏事碌碌無
少暇賴秋門爲竭三月之力錄存四百餘首集
成示余爰亟勸付梓以與海內知詩者共賞之
道光己丑孟夏之月同里愚弟李肇慶謹識于
灞陵官舍

二南詩鈔

濟南周樂二南

著

同學余正酉秋門評定

新移竹至間有活者喜誌以詩

愛竹移竹至。栽竹怕竹死。移來竹醉日。頽靡胡至此。或亦如高士。林泉憚遷徙。託根非故鄉。不習土與水。連朝霑細雨。恰似病微起。枝葉黃復青。檢點喜撫髀。奚奴望速活。覓澆魚腥美。是亦掘苗智。未喻攝生理。譬如沈疴回。那遽進甘旨。腴土漸培養。

二南詩鈔

卷上

一

炎天勤護視。日日報平安。生機自不已。我為新主人。君乃古君子。蕭齋坐相對。未必為君恥。願君長子孫。堂構從此始。時來鸞鳳聲。一稔塵俗耳。

初春卽事

積末風來雨乍晴。閉門懶作踏春行。花纔着樹雨三點。鳥偶催耕四五聲。夢裏懷人隔燕趙。病中斷酒過清明。獨憐兒女嬌無賴。但聽吹簫索買餚。

移居

移家幽絕處。邱壑自天成。鎮日聽溪水。過橋作瀑。

聲萍蹤聊此憩。塵夢若爲清。翻覺在城市。勞勞太
不情。茅屋大如斗。溪邊八九間。愛花多闢徑。種樹不遮
山。菽水高堂供。漁樵比舍閒。此中堪小隱。常擬閉
柴關。

風箏

斷續箏聲何處彈。東風高調起林端。尙留一綫青
雲路。未免羣兒白眼看。此曲祇應天上有。知音強
索世間難。賦來命薄原如紙。敢向荒郊怨苦寒。

二南詩鈔

卷上

讀項羽本紀

叱咤天生蓋世姿。寒宵披卷想鬚眉。英雄磊落鴻
門酒。兒女悲涼垓下詩。子弟空羞吳父老。風雲常
護漢旌旗。艱難百戰成遺恨。讀罷燈昏淚暗垂。

帝業經營獨戰場。拔山有力氣堂堂。重瞳至竟興
三戶。一炬差堪慰六王。鉅鹿功名成破釜。沐猴籌
策失歸鄉。范增不殺虞姬死。翻覺英雄勝漢皇。

題紀秋水豆花集

各淫文安人

余非燕趙士。對此亦悲歌。操出土音壯。得來秋氣

多。燈昏花欲墮。酒罷劍頻摩。敢附君知己。其如同
病何。

盆魚

游魚三兩尾。寒藻覆深深。纔逐日光上。忽驚人影
沈。斗升暫時計。湖海此生心。越客徒勞甚。垂綸未
許尋。

客散

客散池亭寂。終朝自掩扉。爲沽鄰舍酒。典到故人
衣。竹色連窗碧。泉聲過石微。航吟吾結習。覓句又

二南詩鈔

卷上

三

斜暉

雪天早起

蕭然屋數間。積雪擁柴關。自掃門前徑。遠看湖上
山。過橋溪水活。抱郭野雲閒。欲訪琴翁去。采芝恐
未還。

贈醉琴道士

君本江南客。竹扉湖上開。一琴對山水。終日在樓
臺。醉意非關酒。狂歌放此才。傾談如不厭。時駕小
舟來。

歸安平途次寄鱗江

出城三十里。猶見濟南山。病樹葉交下。深秋客乍還。親衰難久別。骨傲總宜閒。獨惜茱萸會。無絲與座間。

夜行欲宿桐城驛

但任車行去。車中坐亦勞。四垂星影亂。一路地形高。野火驚驚馬。林風透縵袍。從人相絮語。何處市村醪。

自適

二南詩鈔

卷上

久貧人事少。終日掩荆扉。市遠偏耽酒。天寒數典衣。攤書僮並懶。落葉鳥同飛。舊識山僧至。傾談每忘歸。

雪天柬友人

竟宵不成寐。但覺峭寒侵。未曉窗先白。開門雪已深。呼童分徑掃。獨我對梅吟。儻亦足清興。何妨載酒尋。

贈東阿家敬脩

世不乏男兒。似君天下奇。隻身剩琴劍。俠氣到鬚眉。

眉。直道獨交我。異鄉還有誰。泥塗寧久辱。且暫隱
茅茨。

醉歸

醉歸夜將半。村路識微茫。雨過溪橋斷。秋深風露
涼。荒墳疑鬼語。遠樹似人僵。漸覺柴門近。鐘聲起
上方。

雪天野望

看雪愛空濶。平郊一望間。隨風自疏密。此日覺清
閒。白到無餘地。青留幾點山。高人何處卧。獨擬款

二南詩鈔

卷上

柴關

懷服之九弟

時索逋閩中

去年別西郭。塞雁正南飛。茲又秋將盡。如何弟未
歸。夜猿驚客夢。嵐瘴濕征衣。遠道殊堪慮。刀環慎
莫違。
諸弟獨憐汝。異鄉今倚誰。何妨燒券返。一慰陟岡
思。天遠書難寄。家貧累自知。漸看風雪逼。屈指數
歸期。

城東石橋夜坐

人境此幽絕。追涼日一過。水聲城角折。螢火樹根多。何處客吹笛。隔溪漁放歌。夜深未歸去。織月挂林柯。

懷東阿家敬脩

野水浮烟冷。空山落葉深。去年此時節。我輩正登臨。一自樽前別。難從夢裏尋。那堪風雨夜。逼枕亂蛩吟。

送十一弟之齊河

自憐生計拙。使弟遠依人。須念在家苦。莫愁爲客

二南詩鈔

卷上

六

貧。疲。驢。村。外。路。慈。母。夢。中。身。攜。手。殊。難。別。何。堪。過。雁。頻。

過故宅

滿庭秋草新。一見一傷神。生我卽茲宅。過門成路人。燕留何處壘。犬吠舊時鄰。酒侶還相識。傾談覺倍親。

儀舟北極臺下遲客不至

瑟瑟西風拂面寒。登臺獨立久憑欄。櫺中烟起午炊熟。湖上雪飛秋葦殘。畫舫暫容今日隱。雁書難

寄故人看漁翁垂老多情甚。沽酒相邀過別灘。

歲杪送十一弟之長山

殘臘書遙寄。長途雪正寒。此行知汝苦。生計諒余難。孤店郭邊問。亂山驢背看。早將消息寄。相慰報平安。

贈丁寶吾貳尹

名文鉅直隸人

在官同遊旅。飯屋背齊城。夜月雙松冷。秋風一劍鳴。游蹤憐薄宦。結習尚諸生。况復來燕趙。能無肝膽傾。

二南詩鈔

卷上

贈丁慎菴

文鈞寶吾弟

迂疏常自愧。未敢款柴荆。今此共言笑。始知同性情。交人有真氣。憎俗得狂名。不覺傾心甚。無妨世眼驚。

春雪

曙鳥不聞啼。茅簷舞雪低。有時襍微雨。旋復化春泥。斷米身難臥。看山路未迷。擬將尋酒伴。野水漲城西。

雪後望山

夜雪深如許。看山戶不扃。日光能到處。林隙露餘
清清影。暮猶見峭寒。今乍經。沿村樵唱歇。惆悵立
郊垌。

送丁厚棠北上

各元福
寶吾子

楊柳烟津綠。杏花村店開。故人方北上。春色正東
來。顧我難爲伴。當今須此才。行行莫惆悵。黃鳥已
頻催。

縱有離亭別。依然故里回。羨君懷趙璧。驅馬上燕
臺。薄宦艱行李。前程兆詠梅。紅綾分餅後。莫忘寄

二南詩鈔

卷上

八

蒿萊

訪張北麓 文簡 過釣笑泉

沿路望山雪。各泉忽又過。纔從寺門入。陡覺水聲
多。魚躍逆流上。鳥聽移樹歌。故人齋已近。未惜久
蹉跎。

月夜同李仲恂

儻

王青階 聯登

散步南郊外

良夜不能寐。游蹤遠市塵。萬家同一月。四野但三
人。近水風消酒。看山樹倚身。未防歸徑誤。笑語轉
精神。

贈惠印山參戎昌運

絕塞風霜雁影摧。不堪往事首重回。柴門幾斷青
蠅弔。故友曾騎白馬來。久感俠腸古人少。何期樽
酒此時陪。傾談無限纏綿意。贏得嚴城夜半開。

栽花

閒庭未許草成茵。一片芳菲照暮春。點綴清貧娛
老眼。安排隙地坐吟身。自憐料理同嬌女。終覺栽
培愧主人。野蝶多情在何處。早探風信下南隣。

故莊寒食掃墓

二南詩鈔

卷上

九

故里逢寒食。含悽拜墓前。青松澹紅日。白髮阻黃
泉。隴畝皆他姓。村農半老年。臨風自惆悵。愧說子
孫賢。

諸弟年方少。支持獨一身。深悲薦蘋蕩。應念讀書
貧。潑火落寒雨。飛花過舊鄰。惟將兩行淚。灑向紙
灰新。

懷丁寶吾賦寄

自與君分袂。芳樽久不開。絮飛三月暮。雁帶一書
回。冷宦疲行役。窮途老此才。料應遠相念。涼夜重

徘徊。

午後微雨旋霽入夜大雨誌喜

山風起晚涼。簾捲讀書堂。空際自微雨。遠林仍夕陽。徑花垂砌濕。野鳥入雲翔。隱隱聞村鼓。依然祈禱忙。

亂雲拖雨脚。忽逐疾雷傾。竟夜有餘力。一春無此聲。

關心惟破屋。快意啟嚴城。時以早開南門早擬明湖約。

來朝載酒行。

雨後同南蓉江登城南閱武臺野望

二南詩鈔

卷上

十

蕉衫穿樹濕。迢遞共登臺。荒路水侵斷。遠天山截開。初看農事動。時有酒人回。徙倚忘歸去。蒼然暮色催。

盟

伊昔趨炎客。傾身甘遺臭。豈謂蠕動物。秘訣若相授。無骨不知冰。得意溽蒸候。賦形異。三子躡躡儼衣繡。牆隙皆室家。牀幃亦穴竇。結隊腴脂膏。未肯間昏晝。中酒擬酣眠。醜類紛相就。顛翻任咀嚼。綠腰復夾脰。朦朧起捕捉。映燈類紅豆。忿欲殲其族。

逃遁善馳驟。獲之不屑捫。著手那堪覿。血痕漬指
端。點點胭脂透。爾耽食肉肥。不嫌措大瘦。爬癢無
麻爪。屢與室人詬。蝨誦阿房賦。豹脚負山走。聞聲
皆易防。難防此狡寇。沸湯沃不盡。火攻仍襍糅。余
豈逐臭夫。逼處實顏厚。安得西風來。掃除不少宥。
一洗十年穢。灑然卧清漏。

鄭柳田買宅東郭邨寄

時以獄事淹沛寧

疏林茅屋畫中看。白手經營亦大難。熱客幾人問
東郭。浮蹤何處滯南冠。半篙溪水虹橋瀾。一角秋

二南詩鈔

卷上

十一

山雉喋寒。舊里他時攜杖返。烟雲差足慰衰殘。

拜華泉先生墓

墓門依郭牧童知。此日荒郊再拜時。燕月浙潮推
絕調。野風林雨憶佳兒。麥苗深淺低遙隴。石蘚蒼
涼卧斷碑。一代才名空宿草。華山北望不勝悲。

初春偕鄭萍史

雲龍

泛舟湖上

酒甯茶鑄湖上亭。晴春游侶此初經。半城烟出林
梢白。隔郭山從水底青。畫舫逆風行又住。素鱗登
俎醉還醒。漁燈次第沿堤見。棹到橋西尙未停。

謁鐵公祠

蒼松謾謾起寒聲。想見尙書恨未平。百計不教飛燕入。隻身甘就逆鱗烹。湖山終古英魂託。簫鼓經年酒客行。往蹟那堪重指點。女牆遙映晚霞明。

哭范野弟

名奕。費歷城諸生。

排闥淒風夜半侵。文星驚看少微沈。蹉跎竟使斯人死。顛倒難窺造物心。貧念妻孥寧瞑目。信傳朋輩盡沾襟。如何卧榻纔交睫。恍惚仍聞笑語臨。

拜杜工部小像于謝問山焜處

二南詩鈔

卷上

十一

何人慘淡寫鬚眉。戴笠依然飯顆時。舉世心傾白也友。餘年身倚挺之兒。朝廷都作腐儒視。天地無如此老悲。春草堂中得瞻拜。北風吹落淚絲絲。

得子

呱呱有啼聲。入門心暗驚。深知慈母喜。迎說一兒生。書誤聲初弄。珠憐蚌晚成。余辰適相類。同壽合爲名。

早獲兩嬌女。中年此乍經。縱然是豚犬。畢竟勝螟蛉。吟操草爰詞。駢分瓜夜夢。靈事親殊自愧。敢望得

寧馨

早行城南卽事

躑躅沿城轉。行人見尙稀。林霜迎日散。溪鴨破烟飛。疏竹翠交屋。亂泉寒透衣。欲尋湖上約。佇望却依依。

家敬脩下第東歸

寂寂柴門閉。閒居莫自猜。朝廷非不用。天地老奇才。破屋撐風雪。蕪田闢草萊。雙親猶健在。侍養足顏開。

二南詩鈔

卷上

三

生日

白頭一事竟何成。自笑匆匆已半生。數載貧寒真到骨。中年哀樂益多情。空庭日冷無椿蔭。絕塞風高斷雁聲。辛苦讀書終誤我。深愁大厦力難撐。老梅疏影寫窗紗。卅五光陰頃刻花。眼底浮雲看富貴。樽前舊雨惜年華。也知蝶夢原爲幻。任祝豚蹄且自誇。回憶去年此時節。荒村風雪正橫斜。

春初同翟鱗江泛舟明湖卽事

乍別春湖又數朝。忘形游侶喜相招。雨餘蘆帶泥

痕長風過水連山影搖鐵笛隔舟聲欲裂玉驄繫
樹勢偏驕日斜酒盡難成醉更擬行沽過石橋

悼亡

藿鹽終日伴辛勤潦倒鬚眉愧對君
半世能安鳩婦拙一堂未忍雁行分
中年訣別何曾料此後艱難幸不聞
素愛華山青入眼爲君數尺起孤墳
朝朝禱佛盼兒生盼得兒生撒手行
看到孩提不知哭疑他天地太無情
頭顱應早回潘岳婚嫁終當累向乎
一事九泉差可慰他年麥飯有人傾

二南詩鈔

卷上

十四

華仙宋刺史

懋

奉檄運儲卽席賦贈

羽檄下嚴城軍儲急遠征濟陰羣寇聚刺史一鞭
行殘葉響空驛凍雲開列營料應君到日雷動起
歡聲

哭故人陳紀堂

名其綱諸生善書法以酒卒

病榻傳書淚滿巾遲徊尙冀信非真
洵洵二豎連宵夢草草中年落魄身
醫少折肱悲此日事難腹目依何人
驚魂顛倒頻開眼白髮應添幾許新
酒酣落筆氣飛騰片紙留書悔未曾
斷送浮生偏

綠蠟飄零。弔客祇青蠅。魂銷別路花時曲。夢繞空
山。雨夜燈。想到九泉未岑寂。相逢地下足良朋。周
先紀堂死。聖王无妄皆

九日范伯野何岱麓約登千佛山為毘毘之

會

西風孤館獨徬徨。逐隊登高意轉傷。壯歲無名列
千佛。空山有淚灑重陽。筵前眼任他人白。石隙花
猶去日黃。深賴故交相慰藉。不辭攜酒醉千觴。

聞警時曹滑一帶賊匪
有天理會之名

二南詩鈔

卷上

五

夕傳羣寇來。朝說縣官死。既已昧人倫。安能識天
理。妖星流紫垣。燐火躍殘壘。自慨老書生。聞雞空
夜起。

讀詔時大內有警

一紙紫泥書。悲生染翰餘。朝廷尚忠厚。父老共欷
歔。龍種天心助。鯨波國患除。臣工受恩重。讀罷竟
何如。

弔淮陰侯

淮陰疑獄總依稀。鍾室蒼黃頸血飛。帝或有此問

呂雉侯原無語到陳稀奇兵漫誦多多善大度終
嫌將將非不及范增乞骸骨猶全首領故鄉歸
登壇旌旆出堂堂漢鼎初安國士亡一飯尙知酬
漂母三齊寧忍負高皇釣魚臺在空回首逐鹿功
多此下場却喜殘魂猶未餒遺孤變姓寄蠻方

秋日偕李仲恂登北極臺

溪雲湖樹點棲鴉有容登臺夕照斜一夜西風催
木葉半城秋色在蘆花橋通遠市思沽酒松掃枯
枝待煮茶畫艇差堪留小住那禁清吹起悲笳

二南詩鈔

卷上

六

初雪卽事

料峭風微起開門雪片瀟半天兼雨落到地一花
無破賊堪乘夜懷人私隔湖典衣誰市酒解意喜
髯奴時曹寇未平

明湖夜泛卽事

滿湖澄霽色露氣覺微微花鴨沒波出水螢穿舫
飛烟中疏樹合風際白蓮稀夜靜吹笙返漁家未
掩扉

冬夜月色甚佳漫興

滿屋白於書。儼然在冰壺。躡履開門看。皎皎一輪孤。空階數尺地。乍疑水平鋪。中有荇藻動。鄰樹耿扶疏。仰視纖雲盡。四垂星如無。凝眸乃可辨。微耀同綴珠。隱隱隔巷犬。寂寂棲林烏。長空徹刁斗。慨然念征夫。朔風透甲寒。冰霜凍鬚鬢。關山道路難。顧望空嗟吁。快哉吾書生。靜夜堪自娛。敝裘常適體。散步影與俱。依稀迴顧兔。歷歷種白榆。久視益清絕。嫦娥如可呼。徘徊不忍眠。夜深酒難沽。嗟嗟雞亂鳴。獨立尙踟蹰。

二南詩鈔

卷上

七

拜滄溟先生墓

濟南文獻此堪師。藥釐荒墳愧拜遲。七子中原遜牛耳。一時天半望峨眉。春寒麥飯兒孫少。夜黑林風翁仲悲。畢竟高名千古在。蚍蜉撼樹欲何爲。

喜三兄子向榮病愈

寒夜數回起。病深魂暗驚。吾兄獨遺汝。今日竟重生。畏藥啼猶澀。著衣身覺輕。天心終報善。無負戰場行。

只在軍營凡遇。被難婦女悉閉。置一室訪其家屬領去完集。

雪夜從翟麟江齋歸卽景賦寄

把酒雪初下。歸途天乍晴。溪綠冰有徑。身逐月離
城。老樹柴門影。疏鐘遠寺聲。惜君未攜手。獨使感
淒清。

同何岱麓鄰泉登北極臺

寂寂高臺晝掩關。冒寒同此慰愁顏。風疏偶落松
間雪。蘆盡全窺水。底山境憶繁華倍惆悵。人從負
病轉清閒。晚霞沒處湖烟起。尙共憑欄數鳥還。

白雪書院有感

在城西釣突泉上
卽白雪樓故址也

滄溟高調壯齊州。詞客凋零何處求。下視紫瀾廻

二南詩鈔

卷上

六

大海可憐白雪剩。高樓看泉人到頽垣過。種菜畦
荒斷碣留。天使書生開別業。苦吟空自想風流。

臘初偕李喬雲

肇慶

登北極臺待雪

陰晴天氣暖微微。閒步平湖叩寺扉。凍解鷗穿春
水戲。雲開鴉帶夕陽飛。誰家孤艇橫荒樹。繞郭寒
山映釣磯。風色昏黃知欲雪。共期披氅夜深歸。

送翟鱗江之寧津赴某令閱卷之召

寒臘南飛雁。離亭北送君。馬融初徹帳。狐塞欲衡
文。驛路明殘雪。山城覆凍雲。春風計日到。桃李放

紛紛

贈張絲園

數步卽君家。茅堂樹不遮。共余傍溪水。滿院種秋
花。母老游蹤倦。身貧兩鬢華。清談常不厭。往往日
西斜。

夢故宅

別去鄉園繞夢思。那堪風景記當時。到門春水波
平岸。纏樹老藤花滿枝。鄰叟相過開酒甕。空堂依
舊下書帷。醒來蓮漏三更盡。靜對虛窗月影移。

二南詩鈔

卷上

喜晤蔣芷帆時由單返里

曹匪初平

到今纔返里。乍見兩酸辛。肝膽報知己。始終惟此
人。傲裘年暮雪。一劍劫餘身。痛飲休辭醉。生還足
慰親。

倚馬識奇才。茲遊亦壯哉。揮圖繪蓮幕。尊酒賦琴
臺。旆影行營靜。笳聲落日哀。青生翻自幸。親向戰
場來。

贈依光翟四丈

湖前湖後放寒梅。傍湖鱗次柴扉開。中有一翁忘

甲子散仙疑自天謫來。鶴姿灑落性通徹。嗜酒喜
與客相結。牀側常多蛆甕藏。門前無復雀羅設。家
世濟南本清貧。代耕之祿僅養身。金錢到手揮如
土。幾欲置驛招行人。老至舉止益狂放。終朝沈頓
非一狀。但逢年少逕呼名。貴顯造庭懶揖讓。醉極
不妨仍開筵。寸晷卜夜樂陶然。投轄惟恐客潛走。
括輪直使人皆顛。踉蹌倒眠同魚貫。老子飛揚與
難斷。大笑酷似絕纓髯。髯盛怒。或如罵座灌。有時錢
盡客漸稀。縮肩寂坐扃雙扉。面目鷲黑噤不語。霜

二南詩鈔

卷上

十

髯斗覺添微。微偶覩身外餘長物。軒眉不啻著簪
紱。寒天衾裯俱典去。夜踞蒲團學古佛。有妻常嗔
荷鍤游。有子難阻營糲邱。漁父樵豎日爭逐。顏唐
晚景殊風流。齷齪俗子妄驚怪。井蛙醯雞識何隘。
人生幻影水中泡。尊酒且圖眼前快。昔年老友今
誰存。惟餘此老桑梓尊。安知朝朝對歡伯。非卽先
生養生門。今逢先生初度日。車馬填衢客充溢。大
斗持賀愧澀囊。賦詩登堂望促膝。先生達者定解
頭。衰屐應許相追攀。酪酊泥酒知不厭。準擬湖邊

倒載還。

離使劉松齋先生凱還賦呈

機槍一夜羽書紛。海右長城賴使君。共說錦江曾
破賊。重教白髮更提軍。秋風馬度威姬里。野火狐
鳴曹叔墳。小髯山即曹叔墓勤撫機宜符。廟畧紅旂計
日奏殊勲。

火報平安及早春。東風吹送凱歌新。朝廷暫錫分
藩職。父老爭看百戰身。部曲士歸紛笑語。國門馬
到獨逡巡。錄功佇見移旌節。只恐閭閻借寇恂。

二南詩鈔

卷上

三

寄懷袁玉堂明府潔

時以誤報金鄉寇解官

此地重留滯。功名處最難。却憐身對客。不識已無
官。夢有誅鯨樂。人還失馬看。先生且高卧。佇見起
袁安。

早發禍猶小。徙薪謀自高。慮長身竟累。官罷氣逾
豪。大吏方持法。微臣敢告勞。懷君起深夜。幾度賦
離騷。

曉行泥海二十餘里即賦呈

上下車輪溜。崎嶇路逕迂。敢云憚艱苦。久已在泥

塗。凍。鳥。林。邊。寂。荒。村。烟。際。無。眼。看。行。旅。斷。何。處。問
迷途。

途中卽景

峭。風。吹。病。葉。飄。忽。下。林。輕。落。日。客。難。息。古。原。人。自
耕。無。心。片。雲。影。接。翅。萬。鴉。聲。何。處。堪。投。宿。村。燈。出
樹。明。

留別朱鑑泉少府

漢

水。亭。山。寺。日。開。筵。小。住。驚。看。月。再。圓。量。狹。偏。因。余
痛。飲。吟。狂。頗。厭。世。周。旋。是。何。客。到。妻。孥。怪。愛。此。官。

二南詩鈔

卷上

五

閒。雞。犬。仙。不。是。萼。鱸。類。入。夢。西。風。誰。遣。理。歸。鞭。

歸途遇雪

北。風。吹。雪。起。捲。地。作。烟。飛。直。到。烟。深。處。依。然。雪。滿
衣。川。原。益。空。濶。城。郭。認。依。稀。欲。覓。荒。村。憩。家。家。靜
掩。扉。

雪後早行

一。望。全。無。路。崎。嶇。覓。徑。行。驢。鳴。村。漸。曙。鴉。噪。雪。初
晴。客。侶。暗。相。語。關。山。難。計。程。遠。看。烟。隱。隱。知。是。濟
陽。城。

雪後途中望濟南諸山

祇道寒雲白。驚看縹緲間。那知天半雪。都是故鄉山。皓首如相讓。晴郊揖我還。饑驅不得意。對爾有慙顏。

書院獨坐聞蟲

蔓徑皆荒草。微蟲處處鳴。星河耿夜坐。天地此秋聲。虛室無人織。空階有客情。愁深渾懶慢。多愧著書名。

感楊越公歸樂昌公主事

二南詩鈔

卷上

三

鏡與人俱去。鏡歸人亦歸。曉妝重拂拭。秋月轉光輝。綽約姿逾媚。團圓願不違。誰家歌玉樹。回首淚沾衣。

同家介屏重游郭園

落葉入門滿。小園重到時。流泉移故徑。欹石寫前詩。客少談逾久。天寒醉却遲。黃花堪插帽。歸折竹邊枝。

劉松齋先生爲言某縣令爲賊所戕父老尋

之不得見有羣蠅飛集一處掘而得之感

賦

碧血漬蒼苔。嗟乎百里才。那知墜鳧處。真有弔蠅來。魂逐衣冠葬。恩留父老哀。姓名人不識。誰爲奠蒿萊。

宴集也可園

游侶閒鷗集。名園續舊盟。樽開花隙地。吟聽樹邊聲。雨過水爭上。雲移山欲行。卽今同調在。身世忘枯榮。

題謝太傅東山對奕圖

二南詩鈔

卷上

七

那許投鞭可斷流。龍驤驕虜掌中收。偏安霸業支殘局。一路精兵據上游。家有芝蘭應自幸。敵聽風鶴盡生愁。桓冲慷慨勤王急。豈識東山計畫周。暇日松陰一局棋。角巾風度想當時。游山伴侶曾攜妓。破賊功名祇付兒。絲竹中年寫哀樂。風流江左繫安危。先生不負蒼生望。賭墅猶留去後思。

亡內生日有感

猶記去年君此時。拔釵沽酒不曾辭。倏成地下經秋別。那禁樽前老淚垂。怕見家人來慰藉。愁聽嬌

女說容儀夜深未敢酩酊醉團雪煎茶更仗誰

聽劉松齋先生說朱總戎殉節事

朱公諱射斗貴統人

官川北總兵爲川匪冉天元所敗死後賊恒見其匹馬斫營及獲公尸面上汗猶津津出公陣亡後馬自歸亦旋死

旌旗指處望先驚血灑巴山恨未平矢石孤軍身已死鬚眉七日面如生壘空戰馬猶歸櫪月黑忠魂尙研營怪底使君有餘痛當年沙磧共提兵

登城南高臺遇雨卽事

追涼出近郭曠野此登臺雲抱諸山合風吹急雨

二南詩鈔

卷上

七

來河聲田水下橋影晚虹開四顧遊人盡披襟尙未回

友人爲余寫小照不似因賦二律

年來四十已華顛忽變朱顏一粲然自信不由他笑罵却忘今與我周旋逃名任世呼牛馬混俗隨心學佛仙回顧山妻堪絕倒愁容說比舊時妍阿堵傳神意亦閒何曾真面見廬山幸居一壑一邱地應在不夷不惠間俯仰隨人非本色模稜到我覺羞顏如來說法原無相草藁初成那用刪

劉松齋先生由巖使改登州都督賦贈

詔許都門養病身。旋聞節鉞沛。思綸儒生到此。
真奇遇。開國以來能幾人。鼙鼓漫教思將帥。簿書
應恐累勞臣。凌烟記取他年像。猿臂沈雄鶴髮新。
蓬萊高閣快登臨。一曲涼州恩遇深。白首竟償我
筆願。青天原少愛錢心。公為合有青天名
皇帝賜詩有云生性出來
不愛錢。雲開營壘隨山勢。夜靜風濤動鼓音。若得將
軍容揖客。朝朝磨盾事高吟。

咏史

二南詩鈔

卷上

美

爾墓木已拱。素服哭秦師。吾墓櫬可材。於越入吳
時。老臣計豈謬。彼昏自不知。秦穆幸自悔。孟明三
用之。濟河沈其舟。煌煌開霸基。惜哉吳夫差。孤忠
付鴟夷。殺父讐已忘。溺人笑何為。興廢固由天。用
舍關安危。嗟嗟棟梁材。終藉松柏姿。

題白鶴

鶴翎

小照

直隸人善岐黃像作僧
脚踏狀時寓居圓通寺

異鄉身作客。風味便如僧。荒利常橫榻。浮生幾折
肱。竹烟度清磬。鶴夢照寒燈。習靜先生福。勞勞愧
未能。

藥石常生我。殷勤感故知。於儒爲有用。並俗亦能醫。梅鶴中年感。雲山出世思。添毫誰妙筆。寫就古鬚眉。

范伯野 桐招爲消寒之會卽賦

墜樹飛殘雪。開門納遠山。傲裘誰蜩縮。此日覺鷗閒。半榻琴書共。一樽松竹間。城南居幸近。總擬醉時還。

共許周郎顧。還憐范叔寒。歲窮集儔侶。斗酒慰艱難。幽壑鬚眉古。醉鄉天地寬。雲泥異時隔。恐少此

二南詩鈔

卷上

七

盤桓

悼亡

蘇氏 繼配

年來生計誤。儒冠健婦持。門心稍寬性。爽偏宜我。疏懶家貧獨。仗汝艱難庭。留荆樹弟兄。樂衣斷蘆花。兒女歡。死去纔知作人好。枕邊何日淚痕乾。去年寒食上墳歸。寒食今年悵此違。到死口無身後事。開箱哭殮嫁時衣。懷中嬌女啼驚夢。夜半芳魂見入幃。地下望夫應有伴。燈前回首淚空揮。

有感

甘載芝蘭臭味親。一經冰炭意逡巡。梁鴻元不因
人熱鮑叔何曾知我貧。借箸籌勳才力拙。絕交書
漬淚痕新。蕭齋從此門常閉。任笑顏唐七尺身。
故人各已鬢霜侵。惆悵西風懶再尋。瓜李浮沈同
調久。雨雲翻覆到交深。名流寧忍負張耳。俠客獨
難逢季心。且抱古琴自長嘯。清秋松竹最蕭森。

初冬月夜同李仲恂白甸柳莊歸途卽事

天邊涼月正當頭。岑寂荒郊豁遠眸。良夜最難逢
此夕。清光倍覺勝中秋。隔林山影如雲退。滿地松

二南詩鈔

卷上

天

陰作水流得住。城南殊自幸。冬冬漏鼓不須愁。

題王叟小照

戲爲俗所製。概不倒
狀。蓋慨世之意深矣。

蒲團海右久勾留。哈哈先生得自由。險處亦知難
立脚。過來一笑早回頭。紙糊泥塑逍遙訣。蓬轉萍
浮汗漫遊。七十年華身尙健。逢場作戲足風流。
鬚眉如此竟長貧。世事寧須苦認真。顛倒一生憑
造物。扶持今日仗何人。欲求安穩宜藏迹。聊解模
稜足保身。蹭蹬年來思作達。願聽揮麈說前因。

偶感

吳木蘭
蘇少爽意
蘇少爽意
蘇少爽意

修士乏恒產。讀書一無成。豈無進取志。念慮紛經營。簞瓢顏氏子。負郭田足耕。不然陋巷裏。百憂恐交并。嗟余生不辰。謬挂儒冠榮。屋產既蕩盡。兩兄歿戰爭。一家三十口。宛轉孤身撐。舌耕不常稔。俯仰心怍怍。諛墓或攫金。索繚偶噉名。有時叩人戶。饑驅學淵明。丈夫不得志。俗眼顧相驚。曉曉繩禮義。衆口紛沸騰。聖人勸謀道。大儒勉治生。必甘絕糧厄。虎兇何悲鳴。必慕咽空操。蚯蚓胡相輕。已矣各自謀。涇濁渭自清。勵余平生志。謝彼賢豪聲。

二南詩鈔

卷上

无

寒鴉

聯翩飛處過如風。指點柴門夕照空。接翅寒雲橫陣黑。爭枝病葉下林紅。山村無意隨歸犢。泥雪有時依落鴻。要仿蘇髯呵凍筆。雙雙塗向畫圖中。

爲梁卧南一龍

題面壁美人圖

手持蘭傍有榴花一林

照眼花枝誰寫真。傾城顏色想橫陳。多情擬喚圓圓下。回首難禁醋醋嗔。團扇淒涼臨鏡懶。遠山依約鬪眉新。深閨應有微蘭夢。獨對寒燈憶遠人。

送蔣望峯

錦標

之青州參軍

軍志念

勿以眇微祿。離亭悵袂分。自來古名士。大抵屬參軍。山色冷含雨。鴈行斜度雲。到時應一快。從事酒堪醺。

班姬咏

君王辭共輦。窈窕似姬難。舊寵移飛燕。無聊賦寡鸞。落塔秋草徧。栢館夕陽殘。團扇依然在。西風懶再看。

贈烏翼侯少府

名飛卿四川人精醫術

神農氏出古聖人。農而神也。醫更神。赭鞭鈎鋤巡。

二南詩鈔

卷上

辛

岳瀆與太乙。游得其真。徧嘗穀石及草朮。經成遂貽千古福。庸醫借之以殺人。福兮反爲禍所伏。惟緩與和道非迂。夢中能將豎子驅。學通周易辨蟲血。兩人名醫實兼儒。儒者醫理最能知。淵源有自照不疲。功分天地思參贊。藥辨君臣慎保持。先生文章今第一。餘技兼工青囊術。蓮幕細讀三世書。於中獨闢靈境出。吾家有人病卧牀。呻吟知已入膏肓。無計能添長命縷。何人爲覓返魂香。先生一到舉家慶。乃操噓枯吹生柄。數年可憐李百藥。

且○竟○成○霍○去○病○先○生○之○醫○如○行○兵○兵○不○在○衆○貴○在○
精○擒○賊○擒○王○有○定○見○旌○麾○指○處○無○堅○城○先○生○療○疾○
如○泊○水○靜○尋○脈○絡○探○本○始○防○其○潰○決○導○之○流○行○所○
無○事○而○已○矣○奇○才○想○必○授○自○天○妙○緒○儼○窺○軒○岐○前○
但○能○應○手○卽○奏○效○何○用○折○肱○始○稱○賢○嗟○乎○世○間○沈○
痼○多○不○救○彼○肘○後○方○難○株○守○安○得○先○生○化○爲○百○千○
萬○億○身○盡○使○六○合○八○荒○同○登○松○喬○壽○

劉少府同陶稚雲遂過訪喜贈

稚雲不羈士公乃與之游此眼世寧有相交吾所

二南詩鈔

卷上

三

求館空槐蔭合雨細豆花秋深羨同居樂詩思想
更適

已卯榜下寄張北麓時以額滿置副榜

久辱泥塗四十年霓裳小奏大羅天榜名巧綴孫

山後鞭影仍輸祖逃先海上化龍纔得半管中窺

豹未能全側生荔子休惆悵落葉紛紛更可憐

摩壘偏師勇有餘此番拔職足軒渠佳人貌惜充

旁室力士椎憐中副車幻夢笑陪兄受縛未發榜前一夕

北麓夢與兄醉鄉泣看弟留書北麓亡弟魂附家入書告兄日今科同被捆縛

中舉不功名。小就知天定。快飲金樽且莫虛。

題喬松石嶽小照

點染鬚眉看逼真。槐亭下筆妙傳神。十年以長深
慙我。隻眼相交獨此人。北海尊壘增俠氣。東山絲
竹寄閒身。卽今偶向圖中見。猶使鄙懷似飲醇。

已卯秋闈不售。聞爲李復齋先生所薦。感賦
草草杯盤燈火殘。驚聞報罷興闌珊。相憐老友猶
沾酒。深愧旁妻強勸餐。鬚鬢此宵成雪易。功名獨
我上天難。繩牀顛倒頻開眼。隔牖疏槐落葉乾。

二南詩鈔

卷上

五

魚龍變化失風雷。舟到神山復引回。尚有英雄知
駁骨。自憐醜女誤良媒。事經見慣胸翻拓。功敗垂
成志益灰。幸是登高逢九日。破除醜耗共銜杯。

爲王雪泉

大綸

題乞已圖

買山起茅屋。傍溪列松竹。近村市小魚。比鄰新篔
熟。先生達者流。性情生使獨。得失笑雞蟲。夢幻悟
蕉鹿。天賦余鬚眉。詎可甘匍匐。天畀余筋力。庸肯
事爭逐。飲啄數有定。曳裾徒慙慙。伐檀詩人咏。下
簾君平卜。先生達此旨。隨緣領清福。食貧慮失足。

積學不負腹。雲兮龍自爲。翰墨供餽粥。免得感恩
多。到處身局蹙。披圖我憮然。師君欲齋沐。從茲閉
雙扉。風塵謝碌碌。入讀古人書。出叱老農犢。

呈李復齋先生

量才玉尺費搜尋。引手孤寒感自深。卽此焦桐留
一顧。或應徹帚重千金。珠探滄海無遺憾。舟返神
山負苦心。十度戰場功未就。酸辛不覺淚沾襟。
慘淡文成漬血痕。此中艱苦與誰論。落花詎忘吹
噓力。斷劍常銘拂拭恩。踏踏縱然仍耐轍。品題竊

二南詩鈔

卷上

三

喜在龍門。時人嘲笑先生賞。從此風塵息眾喧。

劉浣香

春塘

邀飲對華橋。酒肆中卽事。

鄰樹高留夕。照明葉飛盡。作雨來聲。認家花鴨如
相語。見客溪魚絕不驚。旅店放懷同澗壑。酒兵制
勝卽功名。對華橋上溶溶月。恰映歸途迤邐行。

哭兒

名全昌時八
歲以痘殤

半世頭顱白。艱辛祇此兒。掌珠今忽失。天道渺難
知。空有錫麟夢。何堪謁犢悲。藥寧將汝誤。惆悵自
猜疑。

兩雪冷交下。昏昏病轉加。離魂悲失路。垂死說還家。微息神空禱。清貧藥枉賒。呼兒已不應。撫視望猶奢。

八齡兩失母。危病屢相驚。到此身仍死。胡爲昔再生。空堂斷嬉戲。造物忌聰明。最痛眸將瞑。猶呼爺一聲。

嬌小全家惜。其如無命何。半生仍伯道。一慟比西河。並此孤根絕。知余涼德多。煢煢餘弱女。相視淚滂沱。

二南詩鈔

卷上

三

題七賁園 汝珍詩卷

北風料峭雪飛時。歲暮歸來鬢欲絲。客館淒涼嗟馬帳。酒壚沈醉笑蛾眉。英雄幾輩淮陰市。巾幗千秋漂母祠。此去先生差不負。江南題遍竹枝詞。

湖上客舍新成蔣望峯參軍邀飲卽賦

軒榭廻環此乍經。芰荷疏樹隔龍玲。半城水氣含宵雨。一片秋心在客亭。隔岸蘆花頭共白。入湖山影眼俱青。也知衫薄涼侵易。愛倚朱欄戶不扃。

題孫拜石風雪騎驃小照

料峭。北風。迷漫。雪。澗。樹。溪。梅。鬪。芳。潔。君。騎。青。驪。凌。
競。來。蹄。聲。蹴。踏。響。如。鐵。此。時。高。士。閉。門。眠。或。則。掃。
徑。或。乘。船。帳。中。酒。飲。羊。羔。暖。鑪。內。茶。烹。蟹。眼。圓。拜。
石。拜。石。何。颯。爽。勒。轡。空。山。意。莽。蒼。儼。然。玉。樹。綴。瓊。
瑤。依。稀。仙。人。披。鶴。氅。奚。奴。呵。凍。攜。焦。琴。關。山。蹀。躩。
相。追。尋。風。景。荒。寒。驅。不。已。我。于。此。處。窺。君。心。伯。牙。
調。高。少。知。已。逡。巡。久。混。緇。塵。裏。印。泥。鴻。爪。稍。安。閒。
瞧。羽。鶴。原。復。傾。否。世。事。真。比。蜀。道。難。書。生。游。興。應。
闌。珊。幾。欲。置。身。天。地。外。白。眼。笑。傲。脫。儒。冠。快。哉。滕。

二南詩鈔

卷上

五

六。散。花。手。花。大。如。笠。送。君。走。高。下。填。平。坑。陷。途。混。
沌。合。爲。遁。逃。藪。又。疑。寸。鐵。不。會。持。爲。君。白。戰。與。奇。
師。君。懷。無。限。不。平。事。于。今。一。洗。而。空。之。興。來。弄。絃。
發。清。唱。山。虛。水。深。性。昭。曠。翻。嫌。灞。橋。若。吟。客。驢。背。
推。敲。小。家。樣。觀。君。鬚。眉。詐。等。閒。尊。鱸。且。將。鄉。心。刪。
吾。儕。得。意。會。有。時。漫。學。希。夷。歸。華。山。君。不。見。當。年。
李。愬。蔡。州。事。風。雪。一。夜。功。名。遂。安。知。非。天。玉。于。成。
男。兒。慎。勿。銷。壯。志。

讀楊忠愍公傳感賦

嶽嶽容城彥。艱難罹百憂。飯牛依牧豎。市馬効驕
侯。師法韓兵部。知音鄭曉游。直臣第一不在壽
星頭。

遠謫心無恨。微官政有聲。井田仿古意。講說進諸
生。煤嶺窮廬利。洮河廢圃清。關西夫子後。夫子合
同名。

絕塞賜刀環。餘生復犯顏。孤忠酬聖主。十罪斥神
人。攀。竊黃菊飄殘淚。紅苔漬血斑。先生自有膽。未許後

二南詩鈔

卷上

美

感激朝遷職。徘徊夜起勤。要爲一鳴鳳。豈畏百仇
鸞。疏出傳天下。心傾到內官。覆盆誰更照。長此滯
南冠。

一死寧君意。羣奸計已深。批鱗早褫魄。養虎自寒
心。浩氣塞天地。丹心留古今。誰能到西市。慷慨向
高吟。

大地猶爲動。偏難動紫宸。偷生笑朝士。死到夫
人。異代雖追謚。孤臣自致身。何時過祠廟。一爲薦
秋蘋。

漫興

朽材早作爨餘桐。隨分經年懶送窮。久已制心同
印板。未能有智似燈籠。養生聊伴支離叟。埋首甘
爲亡是公。底事酒杯難放手。還期大道此間通。
但教捫腹日藏書。那管人間有毀譽。失馬安知非
得馬。覓驢自笑尙騎驢。要從性命尋根柢。漸識功
名是緒餘。兩眼放開看世界。一生受用是逃虛。
不學迂儒不坐禪。情深每苦繭絲纏。真人警效徐
無鬼。名士風流李謫仙。文到愁時益奔放。客從醉

二南詩鈔

卷上

七

後懶周旋如山積債尋常事。却喜曾無欠酒錢。
蹤跡飄零歲月奔。移家又出舜城門。年來狼狽髮
如此。坐守獼猴舌尙存癡福。甘輸長樂老糟邱。應
有莫愁村平生已被詩書誤。却向諸生仔細論。

咏蟋蟀

笑他兒戲賈平章。跌蕩西湖意氣揚。敵鬪不看看
爾鬪。美人日在半閒堂。

贈田丈

鶴髮先生道可親。得居廡下亦前因。石泉聲近涼

侵楊竹樹陰。多綠過鄰文。獻今猶餘此老。耄期天
或報詩人。昨觀壁上閒吟什。不待開樽已飲醇。

王青階秋捷誌喜

晨興看佛錄。狂喜得君名。挾策曾三薦。驚人此一
鳴。吾儕真吐氣。老宿有先聲。厚德傳前世。冥冥自
玉成。

意態何精悍。堂堂四尺軀。青階短小精悍類郭解文成泣神
鬼。戰勝笑侏儒。北海豪逾劇。東方飽可圖。低頭吾
下拜。衣鉢許傳無。

二南詩鈔

卷上

三

贈鄭柳田先生

名士芳精繪事

對郭雙扉鎮日扃。訪君車馬有時停。不扶鳩杖看
流水。能慰龍鍾是小星。眼見雪山共頭白。手栽池
竹到門青。近來通畫先生無多事。作字餘閒閱道
經。

小癡書畫不曾癡。小癡柳田季子亦善畫何異羲之得獻之。

大筆一家真創見。當年三絕未爲奇。郭田菽粟堪

供釀。斑絲兒孫足解頤。七十春秋渾健在。爲君呵

凍賦新詩。

張伯良刺史自深州寄金恤徐雲樵母氏葢
不知雲樵母亦相繼歿也友人范伯野遂
爲選刻雲樵詩一卷余兩美之紀以詩卽
用伯野原韻

雲樵交游紛紛是。晚年得識張刺史。刺史友中劇
孟豪。成其美者乃范子。范子吾鄉苦吟客。鷗社詞
壇執牛耳。爾時雲樵六十餘。瓣香肯拜門牆裏。數
帙空傳海右名。一朝竟填溝壑死。其母淚枯亦去
世。詩人命厄乃至此。我聞范子論其詩。清微殊得

二南詩鈔

卷上

三五

王孟肯。貪多雞肋或無味。少許翻如諫果美。擬汰
沙礫存精金。各以饑驅輒中止。吾友謫雲自北來。
忽寄刺史書一紙。書中丹麥兼白金。云奉雲樵之
母氏。深痛雲樵棄母去。諄囑范子爲經紀。那知其
母亦黃泉。墳頭荒草已盈尺。受金無人擲。反壁又
恐高誼付流水。范子喜曰得之矣。其選雲樵詩付
梓。不負刺史挂劍心。且免後人吹毛恥。梓成范子
寄刺史。長歌芬芳馥蘭芷。吾得此歌數。徃復讀罷
不覺躍然起。世人交游重意氣。生誓膠漆死則已。

文人相輕自古然。矧乃區區雕蟲技。雲樵足跡半
天下。到處名流爭倒屣。胡爲歿後寂無人。青蠅弔
客空。爾爾刺史千里恤其家。范子筆削掎銘誅。雲
樵從茲足千載。賴有生平兩知己。吁嗟乎范子品
泉吾舊交。刺史未見空足跛。安得五馬濟南來。肝
膽當傾古國士。

送呂崇修大令赴保定

崇修由廣文登進士第以知縣分發直隸

開儻京華見此人。元龍意氣鶴精神。售時文字廣
陵散。垂老功名婪尾春。千里櫻桃逢好宴。十年苜

二南詩鈔

卷上

四

蕭。慣。清。貧。燕。臺。把。臂。邀。青。眼。或。許。鴛。鴦。步。後。塵。
蘭。臺。惜。未。列。鸞。行。畿。輔。鳴。琴。夙。願。償。但。使。斯。民。稱
父。母。何。殊。報。國。在。文。章。一。樽。浮。蟻。臨。歧。路。雙。屣。飛
鳧。近。故。鄉。他。日。訪。君。花。縣。裏。濃。陰。應。許。憩。甘。棠。

紫雲館夜雨

孤館無人到。陰雲黯夕扉。震雷隨電至。疾雨挾風
飛。路遠愁沽酒。天寒欲換衣。故鄉渺千里。迢遞幾
時歸。

秋夜讀小青傳有感

開卷復拋卷。夜深愁更深。如卿真薄命。並我亦傷心。月地苔痕滿。蕉窗雨氣侵。徘徊難獨寐。淒調託秋吟。

盼家書示袁序東

聞有音書至。開門急索看。那堪字疏密。是問友平安。白首鄉思苦。緇塵客興闌。春湖魚正美。底事寄來難。

買芍藥數枝插瓶中

檢點金瓶插數枝。買來深巷雨過時。已看春日行

二南詩鈔

卷上

望

將去。如此名花那可離。坐覺微風窗際謔。夢回芳氣枕邊知。酒餘婪尾堪供飲。爲爾開樽醉不辭。

雨後過崇效寺看牡丹

迢遞西城道路迂。緇塵恰到寺門無。連朝細雨啼鳩婦。一夜微風妬鼠姑。春色能招游客至。空門未覺老僧孤。興來市遠難沽酒。笑飲池邊茗數盂。

送宋鐵卿少尉之浙江

鐵卿蘇州人善談兵

燕市相逢幾醉游。匆匆奉檄向南州。微官况味雞肋盛。世功名惜虎頭。載酒好尋射潮弩。聽歌且

上采蓮舟。逍遙未必殊。仙尉寶劍篇。成莫浪投。
西風惆悵跨征鞍。遠望胥山宦興闌。儘有池塘堪
射鴨。不妨枳棘且棲鸞。青雲少府名原重。白羽涼
州遇豈難。若遂他年巖瀨夢。與君尊酒共盤桓。

贈劉玉坡比部

名韻珂汶上人善書法

宦跡京華久。能留本色難。交多無熱客。面冷是秋
官。童識哦詩瘦。吏諳持法寬。記余初見日。快作景
星看。

下筆勁如鐵。知君方正心。臨池分數紙。行李比千

二南詩鈔

卷上

望

金。秀望雲司重。清風汶水深。在鄉傾耳久。何幸此
追尋。

出都留別梁石民

士俊

京華一樣滯飛蓬。半載追尋似夢中。霜鬢相憐君
更老。金臺無分我逾窮。涼雲歸鴈鄉思遠。疏雨零
花客館空。惆悵前途逢九日。燕山滿眼過匆匆。
家貧游宦計原非。匹馬衝寒出帝畿。親拭離樽
含別淚。爲添行李典秋衣。卽今去住都堪悵。此後
雲泥恐久違。餐飯望君須自重。朔風掠地雪將飛。

留別家敬脩

去年相見離華間。把臂匆匆風雪寒。豈意緇塵同
客旅。却令舊雨久盤桓。寺荒樓榭孤身慣。母老關
心五斗難。深感追涼談竟日。累君剪韭手供餐。
杯酒縱橫論古今。虬鬚飄拂氣深沈。知兵不泥孫
吳法。未仕先存父母心。道悟元關同豹隱。壁懸寶
劍作龍吟。門前冠蓋無蹤跡。獨許知交笑語尋。

過深州訪張伯良刺史

憔悴京華白髮侵。賢臺枉欲市黃金。開樽旅店無
二南詩鈔 卷上 四三
人識。落葉長安祇自吟。秋夜尊鱸香入夢。雪天梅
鶴冷關心。歸途山斗當前是。拂拭緇塵杖策尋。

題張伯良刺史詩卷

夜吟常到明。字字苦經營。要斂已才氣。獨存真性
情。心虛友商定。卷富吏鈔成。難得朱轡貴。襟懷如
此清。

筆從何處落。天際起孤岑。刺史誰同調。文昌此正
音。蒼涼遼海道。憂樂洞庭心。一句用伯良詩中意夜靜猶披
讀。莎廳片月沈。

過歐陽珣塚

墓門再拜拂荒榛。錄事精魂夢寐親。和議叱奸真鐵漢。忠肝報國泣金人。樓車彷彿城猶見。野燒荒涼草不春。策蹇匆匆河朔路。低徊不及薦秋蘋。

袁玉堂出塞賦詩留別諸友因步其原韻賦

詩寄之

日下傳聞感歎深。胡爲一諾忘千金。便存從井仁人願。究失懷刑君子心。鐵案百身誰可贖。玉關萬里夢難尋。有才造物寧真忌。使我沈吟直到今。

二南詩鈔

卷上

四

東。藩。勦。寇。舊。垂。勳。每。聽。談。兵。酒。易。醺。可。惜。謫。官。今。出。塞。非。因。破。虜。遠。從。軍。朔。風。虎。下。寒。山。雪。荒。戍。雕。盤。大。漠。雲。到。日。吟。懷。應。更。壯。戰。場。憑。弔。倚。斜。曛。

過漆園城

雉堞參差映夕暉。漆園風景認依稀。水流或有鯉魚在花放。偏多蝴蝶飛。名挂冷官身自隱。書宗老子道寧非。釣臺此去無多路。想見攜竿日暮歸。

羊流店過羊太傅墓

太傅墳猶在。殘碑不記年。功名付逝水。裘帶冷寒

烟古驛。羊流外。青山馬鬣前。問知子孫少。客淚灑荒田。

過三義墳 三丐生同乞死同葬于此

丐者亦知義。宜留三尺墳。餒魂應共聚。奇節竟誰聞。碑泐蘆同斷。山低雲不分。饑驅今未已。爲爾感離羣。

過涑水經秋胡妻邵氏墓

荒塚纍然在。郊原落日孤。野花鬪春色。游子薄秋胡。碑版黃金貴。桑園古木疏。河流嗚咽過。千載爲

二南詩鈔

卷上

聖

歛獻

楊村道中經蔡伯喈墓

士。緣。知。已。死。殘。碣。沒。蒿。萊。荒。矣。千。秋。墓。嗟。乎。一。代。才。史。書。誰。更。續。笳。拍。女。重。來。幼。婦。辭。難。得。題。碑。尙。自。猜。

拜先賢澹臺夫子墓

書劍來官府。深懸謁墓門。當時難貌取。千古此人存。河近蛟龍避。山荒狐兔奔。歸城多曲徑。未敢賦招魂。

南城山謁先賢曾夫子墓

夫子古狂士。浮生一笑過。應嘆腐儒拜。且倚墓門歌。野水晴流暖。春風碧草多。南城斜照隱。歸咏下山阿。

謁先賢司馬夫子墓

在費縣城西北

兄弟人皆有。而君豈獨無。偏緣憂懼死。毋乃讀書迂。荒草蟲吟苦。寒天鴈影孤。低徊同病客。拜罷重歔歔。

謁先賢原夫子墓

二南詩鈔

卷上

哭

九百曾辭祿。墳荒共識名。吾儒貧豈病。千載死如生。山峭林巒瘦。水寒沙礫清。饑驅過此地。下拜早心傾。

哭張幼梁

客死于費

十年不得見。一見竟長別。君原盛德人。奈何中道折。憶昔來東陽。覲面兩歡悅。縱酒話疇曩。贈袍心懇切。聚首時未幾。棄余去如瞥。君園放芍藥。為余親採擷。芍藥猶在瓶。斯人失芳潔。始悟贈此花。不啻遺玉玦。明明言可離。當時誰剖決。傷哉貧為客。

異鄉歿鬱結。兄老難一見。妻少未一訣。幸來膝下
兒泣乾眼中血。兒來君所召。疑有先見哲。亂山負
骨歸。旅魂免孤子。奠君酒一杯。殺蔬聊陳設。君其
享馨香。少微返故轍。尙期夢中來。慰余鬢邊雪。

二南詩鈔

卷上

四

已馨香。小歛送。詩。神。會。賦。懷。中。來。懸。余。鬢。邊。雪。
骨。歸。旅。魂。免。孤。子。奠。君。酒。一。杯。殺。蔬。聊。陳。設。君。其
享。馨。香。少。微。返。故。轍。尙。期。夢。中。來。慰。余。鬢。邊。雪。
二南詩鈔卷上。宋。蘇。軾。一。見。妻。少。未。一。訣。幸。來。膝。下

2
250

1

